

TERA COMPOSTA

E famoso Doctor Carver Washington kende a inventa mas di cien uso pa pinda un dia trahando cu su studiantenan cu un proyectc di cunucu, a yama nan atencion na e importancia di tera composta na unda un mata di pampuna tabata crece berde y abundante. "Observa", e di cu nan. "Boso ta mira cu tur e matanan aki rond ta seco excepto e mata di pampuna ey. E diferencia ta cu e ta creciendo den tera composta, na unda bosonan tabata benta retaso di cushina cu a mezcla cu tera y foyonan." Despues pa demonstra e importancia di esaki, e maestro y su studiantenan a saca varios samplonan di e tera composta y a analisanan. Nan a haya sabi cu e tera tabata rico di nitrogine, potas, y fosforo elementonan necesario pa e bida di un mata. Pa un definicion apropiado pa tera composta, nos por sigui e proverbio cu ta splica cu tur cos cu bini di tera atrobe na su fin. Casi tur cos organico ta putri y bira tera; pero den e cambio aki nan ta bira tera composta cu fortaleza pa e matanan nan cuminda. Matanan crece den tera composta bruha cu e tera gewoon ta haci e tera mas poroso (cu espacio di aira) y ta yuda mantene su frescura; y e matanan ta pari frutanan mas saludable y nutritivo. Pesey, awendia nan ta usa e terminologia hardinero organico pa e hardireronan cu ta specializa den e uso di material organico so y cu no ta usa nada artificial pa nan matanan.

Tera composta por ser traha di: retaso di cushina, (casca di batata, aplo, apusina, casca di webo), foyo di mata, yerba, y kwalke retaso organico. Nos ta coba geet den e tera y dera retaso di cushina den careda, anto despues nos ta bruhe cu e tera; y pa tene muha nos ta usa awa di baño. Tin hopi hende cu ta traha un parapete di composto usando cuatro staca cu waya rond di dje. E importancia ta cu aira mester pasa door di dje y mester tene muha siquiera parcialmente. Si hende usa un bari, mester pone riba bloqui pa mantene espacio di aire bao di dje. Esun cu nos mes ta traha, nos ta pone cuatro staca, anto mas abao

nos ta pone un waya di cura di galiña pa mantene e porosidad. E prome laag ta di foyo; riba esaki nos ta pone un poco tera, y mas ariba di esaki nos ta pone retaso di cuminda. Tambe ta bon pa hende pone calki y mes pasobra esakinan ta contene nitrogine cu ta accelera e proceso di putrimiento. E parapete mester ta muha a lo menos cada pasa un dia, y despues di un siman mester bire cu un shovel. Si e materia organiconan ta garna chikito, nan ta putru hopi mas lihe. Corda no tira ningun sorto di carni o saus o vet den e parapete pasobra nan ta trece peligro y roedornan djaca cu raton.

Otro fuentenan di elemento organiconan cu ta masha usable ta: cachicachi di coffi, casca di pinda, casca di noot, sas di palo geza, y garnachi di taki di mata. Coffi ta masha rico di nitrogine (2.0). Casca di pinda ta hopi halto den tur tres e elemento basiconan. E ta contene: 3.6 nitrogine, .70 fosforo, y .45 potas; su shinishi ta contene .8 nitrogine, .15 fosforo, y .50 potas. Ora cu nos kime anto nos por ripara cu e ta baha den tur e elementonan excepto potas. Pesey nos a establece biaha pasa caba cu tur materialnan organico quima ta rico di potas. Si nos wak bek na tempo nan pasa, nos por conclui cu nos biewnan tabata experto den tera composta. E sistema di traha dam di palo di maishi y bira tera tabata un methodo practico y beneficoso pa e tera composta. Aviso: ora cu e parapete di e materialnan organico ta putriendo e ta bira hopi cayente y por quima mata; tambe corda añadi poco calki na e pa minimiza malholo. Finalmente ora cu e parapete bire humus, hende por sefte, bente den bari di awa; anto 24 o 48 ora despues por muha mata cu ne. Den e ultimo articulonan nos a papia riba e: acedad y alkilinidad di e tera; riba e nutricionnan, nitrogine, potas y fosforo; awor riba tera composta. Den e siguiente articulo nos lo bay discuti un sistema nobo di proteccion pa e frescura (humedad) di tera yama sistema di mulcha.